

تخاريف لها مغزى : لقاء مبارك والبرادعى



الخميس 1 يناير 2004 12:01 م

04/01/2010

كتب - جلال عامر :

- (أعتقد أن السيد الرئيس أكبر من أن يسمح بخصومة شخصية مع أحد مواطنيه، لذلك أظن أنه سوف يلتقى بالبرادعى عند حضوره إلى مصر وأتخيل الحوار).
- حمدلله بالسلامة يا محمد، عامل إيه فى الوكالة؟
 - سيادتك عارف يا أفندم إنى مشيت؟
 - وتمشى ليه! كنت خليك قاعد على قلبهم، عموماً إرمى ورا ضهرك، مش بيدوك معاش كويس؟
 - الحمد لله يا أفندم
 - يعنى بيكفيك؟! خلاص بقى مادام بيكفيك يبقى ترتاح، الإنسان فى سنك محتاج راحة، عندك أولاد؟
 - أيوه يا أفندم عندى أولاد
 - وبتحبهم؟
 - طبعاً يا أفندم
 - عال عال، الأولاد فى السن الحرجة دى محتاجين رعاية
 - همه مش فى سن حرجة يا أفندم، دول متجوزين وعندهم أولاد
 - برضه يعتبروا فى سن حرجة إنت بفالك سنين بره بتتعامل مع «الكتلة الحرجة» بتاعة اليورانيوم، لكن السن الحرجة دى حاجة تانية خالص، ويا ترى إيه مشاريعك للمستقبل؟
 - والله يا أفندم لسه مقررتش
 - ما قررتش إيه بالضبط؟ يعنى إيه هو الذى إنت لسه ما قررتشوش؟
 - البرادعى يفكر (بعد السن الحرجة والكتلة الحرجة جاءت اللحظة الحرجة!)
 - أنا يا أفندم ما قررتش لسه هل أقعد فى «فيينا» أو أرجع شقة «الجيزة».
 - الجيزة كلها مشاكل، أديك قاعد هناك وكل فترة تبيجى مصر تفتح الشبابيك وتهوى الشقة
 - لكن يا أفندم سمعت فى الجرائد إن الشعب
 - (مقاطعاً) مالكش دعوة بالشعب، ما حدش فيهم يقدر يبجى جنب الشقة
 - يا أفندم مش قصدى، أنا بتكلم فى موضوع تانى، بيقولوا إن الشعب
 - (مقاطعاً) خليه يقولوا براحتهم، مش معاك عقد الشقة؟ وأديك اتفرجت على القصر من نفسك، عايز إيه تانى؟

المصري اليوم